

El dernière dè Zante.

Nî pusse à vind' qu'à louwér.

Du vos ai djà parlé dè l'vieille Zélie du Caraco qui est morte l'année passée au mois d'fèvier.

Suite à ça,es' garçon,Zéphyr qui d'moroût à Scharbek avoût décidé d's'installér dins l'maison dè s'mam,donec dins l'min-me hamia qu'nous aut's.

Au début,es'madame èyè li astin'té enchantés! Pour li,ç'astoût in r'tour à l'source pusqu'il est v'nu au monde doûlà.Pou s'feume,çî l'découverte du paradis:des pachîs,des vaques,des pierrots,el bon air,etc...

Malheureus'mint,ça n'âra nî duré lômint!

I travaill'té tous les deux à l'commune dè Scharbek:ène place à n'nî abandonné pasquè ç'est yeune des rares ayusquè l'C4 n'exisse nî co! Ca veut dire ètou què tous les djoûs à 6 heures du matin,I mont'té dins lun auto pou n'nî avoû trop d'bouchons su l'autostrade èyè I faut comptér 6 heures è d'mi pou les vîre réatterri à lun maison.

In pusse,vu l'augmintation du prix d'l'essence (130 km par djoû,ça fait in moncha d'€ au d'bout du mois!),I z'ont décidé d'd'allér au train,donec co ène demi-heure pu timp' au matin pou l'dèpart!

Ajoutez à ça què,despûs in mois,quand I s'in vont,I fait co noire nût èyè quand I r'vien'té,I faut dè l'lumière pou vîre ène saqué.Donc,les pachîs,les vaques èyè les pierrots,I n'lun d'meure pu què l'sam'di èyè l'diminnse pou s'moustrér à Zéphyr èyè à Irène(es petit nom m'est r'vènu).

I z'ont donc décidé dè rapitotér dins lun appartèmint à Scharbek èyè d'louwér l'maison Zélie.(I paraît qu'I vaut mieux nî l'vind' avant trois ans pou nî avoû d'imbrouilles avû les contributions.)

Zéphyr a donc fait passér in annonce dins l'Cayoteu èyè su s'dèvanture, il a planté in piquet avû in panneau: « A LOUER ».

Vos d'allèz m'dire: « Eyè Zante,qu'est-ce qu'I vînt fai là d'dins? »

Hè bîn figurèz-vous qu'il a des averlus(djônes ou moins djônes?) qui ont yeu l'bonne idée dè dèplacér l'panneau èyè dè v'ni lè stiquî dins l'haille dè Zante,bîn visîb' pou tout l'monde sauf pou Zante.

El'nouvelle a yeu rète fait l'tour du villâdje avû toutes les interprétations possib's èyè imaginâb's:

-Zante est trop vî;I s'in va à l'hospice.

-Dins ces maisons-la dè l'ancienne « Terrienne »,I d'a co qui apparten'té au Foyer èyè avû tous les magouilles qu'il a là-d'dins,...

-Zante n'a pu l'santé pou intertèni in grand jardin ainsi,donec I s'in va dins in appartèmint au Rû.

Zante, quant à li, n'astou au courant d'rîn du tout. Donc, il a sté bîn saisi quand il a n'saqui qui li a tèlèphoné pou li d'mandér si il avoût ène cuisine èquipée.

Il a sté co pu maû interpris quand l'gaillard li a d'mandé si l'WC astoût dins l'salle dè bains ou bîn séparé. Là, il a raccrochî in d'sant à Fine què çî co bîn seûr el min-me genre dè lascar què les cîns qui li tèlèphon'té pou li dire qu'il a sté tiré au sort èyè qu'il a gangnî in canapè in cuir. Il a-enfin-compris l'affére quand l'gamin dè l'grande Gabrielle (in aut' visène) est v'nu sonnér à s'porte in li d'sant:

-Bondjou Zante. Vo maison m'intèresse.

-Mais elle n'est nî à vind'.

-Du n'vos pal' nî d'l'aquatér mais dè l'louwér.

-Elle n'est nî à louwér non pu.

-Pouquè ç'qu'il a in affiche « à louer » su l'dèvant d'aboûrd?

Après tout ç'què du vos ai djà raconté à propos d'Zante, vos dallèz yesse saisi dè l'suite: Zante a bîn pris l'farce. I d'a min-me ri!

I s'a quand min-me despéchî dè d'allér r'mett' el panneau à s'place èyè il l'a fait t'ni avû in cad'nas.

Quand I m'a raconté l'affére, I m'a dit qu'il avoût djà des doutes su les « dèmènageux d'panneaux »!

Françwès.

Caraco = petit gilet pour dames/pachî = prairie/moncha = tas/rapitotér = revenir(chez soi)/dèvanture = façade/averlu = farçeur/stiquû = insérer, placer dans/haille = haie/n'saqui = quelqu'un/es despéchî = se hâter.

*Cette aventure m'en rappelle une autre que j'ai vécue dans ma jeunesse. Sa narration dans un prochain billet.

